

CONVENIO DE COLABORACIÓN ENTRE A DEPUTACIÓN DE PONTEVEDRA E A DEPUTACIÓN DA CORUÑA PARA A REALIZACIÓN DUN MONOLITO CONMEMORATIVO PARA HOMENAXEAR AO GARDA CIVIL JOSE ANTONIO PARDINES ARCA Y VITIMA DUN ATENTADO TERRORISTA DE ETA.

Pontevedra, 1 de xuño de 2018

REUNIDOS

Dunha parte D^a María del Carmen Silva Rego, na súa condición de Presidenta da Deputación Provincial de Pontevedra, actuando en virtude das competencias que lle atribúe o artigo 34.1.b) da Lei 7/1985 de 2 de Abril Reguladora das Bases de Réxime Local.

Da outra, D. Don Valentín González Formoso, na súa condición de presidente da Deputación da Coruña, actuando en virtude das competencias que lle atribúe o seu cargo.

Da fe do acto D. Carlos Cuadrado Romay, Secretario Xeral da Deputación de Pontevedra.

As partes recoñécense, mutuamente a capacidade e lexitimación suficientes para o outorgamento do presente documento, a cuxo fin

MANIFESTAN

Que é competencia propia da Deputación o fomento e administración dos intereses peculiares da provincia, tal como establecen os artigos 109 e 118 da Lei 5/1997 de 22 de Xullo de Administración Local de Galicia. A tal efecto o artigo 118 de dita Lei encomenda ás Deputacións no marco da administración dos intereses da provincia, a creación, conservación e mellora dos servizos que contribúan ó seu fomento, e en especial da conservación de monumentos histórico-artísticos.

Que a Lei 33/2003 de 3 de Novembro dispón que os bens e dereitos patrimoniais das administracións públicas poderán cederse gratuitamente para a realización de fins de utilidade pública ou interese social da súa competencia, a outras entidades públicas ou asociacións declaradas de utilidade pública. En concordancia co anterior o Regulamento de Bens das Entidades Locais dispón que poderán cederse os bens patrimoniais a institucións privadas de interese público sen ánimo de lucro para fins que redunden en beneficio dos habitantes do termo municipal.

Que a Deputación da Coruña pretende instalar un monólito conmemorativo para homenaxear ao garda civil José Antonio Pardines Arcay, vítima de atentado terrorista de ETA, na súa vila natal.

Que a Deputación de Pontevedra dispón dunha Escola de Cantería, co fin de promover a defensa do patrimonio histórico-artístico e a formación nesta materia, de

xeito que os froitos do proceso formativo dos seus alumnos, reverta a favor das administracións públicas ou asociacións sen ánimo de lucro para a súa colocación en lugares emblemáticos ou para celebrar ou conmemorar feitos e datas singulares.

Que para artellar a colaboración entre as partes, prevese a fórmula do convenio como idónea para acadar os obxectivos propostos. Neste senso os convenios son acordos con efectos xurídicos adoptados polas Administracións Públicas, os organismos públicos e entidades de dereito público vinculados ou dependentes ou as Universidades Públicas entre sí ou con suxeitos de dereito privado para un fin común, tal como establecen os artigos 47 e seguintes da Lei 40/2015 de 1 de Outubro de Réxime Xurídico do Sector Público. Os convenios constitúen un instrumento adecuado para desenvolver a súa cooperación en cuestión de interese común, segundo resulta do contido do artigo 57 da Lei 7/1985 de 2 de Abril e 198 e seguintes da Lei 5/1997 de 22 de Xullo de Administración Local de Galicia.

Que co fin de posibilitar a colaboración entre ambas entidades, as partes conveñen na concertación do presente convenio, con arranxo ás seguintes cláusulas:

CLÁUSULAS

PRIMEIRA.- OBXECTO

O presente convenio de colaboración ten por obxecto a realización dun monólito conmemorativo para homenaxear ao garda civil José Antonio Pardines Arcay, vítima de atentado terrorista de ETA e a instalación na súa vila natal.

SEGUNDA.- OBRIGAS DA DEPUTACIÓN

O Servizo da Escola de Cantería da Deputación de Pontevedra promoverá os traballos de elaboración e instalación dun monólito en pedra.

O ben doado, incluídos os traballos de manufactura importan un valor de 1.841,85 euros, IVE incluído.

TERCEIRA.-OBRIGAS DA DEPUTACIÓN DA CORUÑA

A Deputación da Coruña comprométese a facilitar os traballos necesarios para a instalación, permitindo o acceso a unha toma de corrente o máis preto posible, ou calquera outro indispensable para a realización dos traballos obxecto do Convenio.

En caso de ser necesarios, os permisos, autorizacións e licenzas necesarias para realizar os traballos, correrán por conta da Deputación da Coruña sen prexuízo de que dende a Deputación de Pontevedra se realicen aqueles trámites de colaboración necesarios para axilizar a elaboración dos traballos.

En base á obriga anterior, a Deputación da Coruña comprométese a xestionar, si procede, todas as autorizacións necesarias para acometer os traballos. Así mesmo, unha vez realizados os traballos asumirá a responsabilidade de conservación e o mantemento da peza.

A Deputación da Coruña deberá presentar, unha vez realizados os traballos de instalación, a correspondente xustificación da publicidade realizada, mediante reportaxe fotográfica, recortes de prensa, etc, no prazo dun mes a contar dende a sinatura da acta de entrega ou a requirimento expreso da Deputación de Pontevedra.

O incumprimento das obrigas de publicidade poderá ser causa de resolución da doazón.

CUARTA.- PUBLICIDADE

En toda a documentación e información relativas ás actuacións a que se refire o presente convenio (carteis, folletos, noticias de prensa, páxina web e outros) a Deputación da Coruña deberá facer indicación do financiamento pola Deputación de Pontevedra.

Nos paneis informativos que se coloquen durante a realización dos traballos obxecto do convenio farase constar, ademais dos datos descritivos das actuacións a imaxe corporativa que a este fin lle facilite a Deputación de Pontevedra, a través do seu Servizo de Imaxe e Comunicación Institucional, e neles figurará expresamente o financiamento da Deputación de Pontevedra.

QUINTA.- VIXENCIA

O presente convenio de colaboración entrará en vigor no momento da súa sinatura e estenderá a súa vixencia ata a finalización das actuacións obxecto do convenio, fixándose en todo caso un prazo límite de execución ata o 30 de xuño de 2018.

A vixencia do presente convenio de colaboración poderá prorrogarse coa conformidade expresa das partes.

SEXTA.- COMISIÓN DE SEGUIMENTO

Para o seguimento, coordinación, vixilancia e control da execución do obxecto deste convenio, así como a resolución de dúbidas e resolución de conflitos que poidan producirse na súa interpretación, crearase unha comisión integrada por dous representantes de cada unha das partes, un dos cales terá carácter técnico, sen

prexuízo de que poida solicitarse, de mutuo acordo, a presenza puntual doutros membros e / ou asesores.

A Comisión de Seguimento reunirse cando o estime conveniente o seu responsable, por decisión propia ou a petición de calquera dos seus membros. As súas reunións terán lugar no Pazo Provincial da Deputación de Pontevedra como regra xeral. Na reunión constituínte da Comisión de Seguimento designarase ao seu responsable e ao seu secretario que levantará acta das súas reunións. En defecto de acordo, a Presidenta da Deputación sinalará o responsable da Comisión que actuará en calidade de presidente.

SÉTIMA.- EXTINCIÓN DO CONVENIO

Este convenio extinguirase polo cumprimento das actuacións que constitúen o seu obxecto ou por incorrer en algunha das causas de resolución.

Ademais das expresadas na normativa vixente, as causas de resolución serán:

- O transcurso do prazo máximo de vixencia do convenio.
- O mutuo acordo das partes asinantes.
- O incumprimento das obrigas e compromisos asumidos por algunha das partes asinantes.

Neste caso, notificarase á parte incumplidora un requirimento para que no prazo que se sinala, cumpra coas obrigas ou compromisos que se consideran incumplidos. Este requirimento será comunicado tamén ao responsable da Comisión de Seguimento. Se transcorrido o prazo indicado no requirimento persistira o incumprimento, a parte que o dirixiu notificará á outra parte a concorrencia de causa de resolución e entenderase resolto o convenio.

O incumprimento e a resolución do convenio por esta causa poderá dar lugar a súa liquidación ao obxecto de determinar as obrigas e compromisos de cada unha das partes, as súas responsabilidades, e á indemnización dos prexuízos causados no seu caso, que se dilucirán , en primeira instancia, pola Comisión de Seguimento.

- Por decisión xudicial declaratoria da nulidade do convenio.
- Por calquera outra causa que faga inviable a continuación das actuacións obxecto deste convenio, previa comunicación e tratamento pola Comisión de Seguimento.

OITAVA.- RÉXIME XURÍDICO

O presente convenio ten natureza administrativa e rexerese pola Lei 33/2003 do 3 de Novembro de Patrimonio das Administracións Públicas e o RD 1372/1986 de 13 de Xuño polo que se aproba o Regulamento de Bens das Entidades Locais, a Lei 7/1985 de 2 de Abril Reguladora das Bases de Réxime Local, Lei 5/1997 de 22 de xullo de Administración Local de Galicia, e demais lexislación en materia de réxime local, polos pactos que se conteñen neste convenio, as Bases de Execución do Orzamento da Deputación, e as restantes normas de dereito administrativo, e no seu defecto as normas de dereito privado.

Este Convenio non comporta relación laboral, contractual ou de calquera outro tipo entre as partes máis aló das cláusulas recollidas no convenio, de forma que non se poderá esixir ningunha responsabilidade directa, indirecta ou subsidiaria por actos ou feitos acaecidos no seu desenvolvemento. As partes comprométese a resolver de maneira amigable calquera desacordo que poida xurdir no desenvolvemento deste convenio. Con todo e no caso de aparición de discrepancias que non puideran solventarse a través da Comisión de Seguimento, acordan a submisión do presente Convenio á orde xudicial contencioso-administrativa e expresamente ós xulgados do contencioso de Pontevedra.

E, en proba de conformidade co ata aquí exposto, os comparecentes conveñen en asinar o presente documento, no lugar e data expresados no seu encabezamento.

Pola Deputación de Pontevedra,

Asdo: M^a del Carmen Silva Rego

O Secretario da Deputación

Asdo: Carlos Cuadrado Romay

Pola Deputación da Coruña

Asdo: Don Valentín González Formoso



